



Uzo di Papiamento ta cuestion di concientisacion

DIA 21 di mei lo ta 10 aña cu Papiamento a wordo oficialisa aki na Aruba. July Emerencia di Departamento di Cultura a duna un splicacion di kico tur nan tin planea e aña aki pa cu e aniversario. Ful aña lo tin diferente actividad y proyecto y seun mas serca lo ta Dia di Lengua Materna dia 21 di Februari. E dia aki lo tene un charla na Biblioteca Nacional y dia 23 di Februari lo tin un Dictatdo na Cas di Cultura cual tabata un exito aña pasa. E Dictado ta pa laga e hendenan entrena nan scirbimento corectamente. Tambe Joyce Pereira, president di Fundacion Lanta Papiamento, tabata presente na e conferencia di prensa y el a bisa cu e aña aki ta un aña importante pa Aruba. Tabata un lucha largo pa a jega na oficialisa Papiamento como cu nos tabata un pais colonisa y desde comienso esey ta ensera cu e idioma di e colonisador ta esun cu e pueblo tin cu papia. Cu Papiamento a bira oficial ta demostra cu

Papiamento ta importante paso bo no por ignora e idioma di e pueblo. Nos tin sigur dos siglo ta experienciando algo cu ta bai contra di nos derechonan, esta dunando les den un idioma cu no ta di nos. Esaki ta crea un lucha continuo den e mucha y e maestro y esaki a pone cu e cuminsa e lucha pa Papiamento drenta scol. Esaki ta algo cu pueblo mester carga tambe y esaki ta un desaroyo cu poco poco ta tumando lugar. Den comunidad Papiamento ta hayando mas y mas tereno pa cana y diferente areanan ta uzando Papiamento mas frecuente.

Joyce Pereira a splica cu e lucha a continua den diferente forma pero importante ta e concientisacion pa e pueblo sigui uz'e. Awor ta asta asina leu cu awor tin dos scol cu ta dunando les den Papiamento y e response di e hobenan ta hopi positivo y entusiasmo.